

# PURMERU KARTA KU PAULU SKIRBI PA KORÍNTIUS

## Introduson

Korintu, na pruvinsia di Akaia, na sul di Gresia, seduba un prasa garandi, riku, ma imoral. Paulu funda igreža la (At 18). Anus mas tardi, na kumsada di anu 57, oca ki staba na Éfesu (16.8), utru krentis di Korintu bai la, e kontal di purblemas di igreža, e leba tambi karta ku purguntas. Asin, Paulu skirbi e karta, i trata de asuntus:

Kaps 1—4 Divison na igreža

Kap 5 Kasu di imoralidad di na igreža

6.1-11 Kešas na tribunal

6.12-20 Puresa na vida seksual

Kap 7 Kasamenti

Kap 8 Karni di ronía

Kap 9 Pagamentu di obrerus di Deus

Kap 10 Avisus kontra iran ku dimonius

11.1-16 Omis ku minjeris

11.17-34 Sia di Siñor

Kaps 12—14 Dons di Spiritu; amor

Kap 15 Resureison di mortu

Kap 16 Oferta pa krentis koitadi na Judeia; planus; manteñas

## Kumsada ku manteña

**1** <sup>1</sup>Ami Paulu, comadu pa vontadi di Deus pa sedu apostolu di Jesus Kristu,untu ku ermon Sóstenis,<sup>2</sup>N skirbi e karta pa igreža di Deus ku sta na Korintu, pa kilis ku santifikadu na Kristu Jesus, ku comadu pa sedu pobu di Deus. N na skirbi tambi pa tudu kilis ku na tudu lugar coma nomi di no Siñor Jesus Kristu; i se Siñor, i di nos tambi. <sup>3</sup>N misti pa Deus no Pape ku Siñor Jesus Kristu da bos fabur ku pas.

<sup>4</sup>Sempri N ta fala ña Deus obligadu pa bos, suma ki da bos si fabur na Jesus Kristu, <sup>5</sup>pabia na bo union ku Kristu bo fasidu riku na tudu, na palabra, tambi na kil ku

bo sibi. <sup>6</sup>No tustumuñu di Kristu i konfirmadu na bos. <sup>7</sup>Asin bo ka falta nin un puder spiritual nkuan-tu bo na pera pa no Siñor Jesus Kristu bin. <sup>8</sup>I na guarda bos firmi te na kabantada, pa ka bo fika kul-padu di nada na dia di no Siñor Jesus Kristu. <sup>9</sup>Deus i fiel, ku coma bos pa bo ten kumuñon ku si Fiju Jesus Kristu no Siñor.

## Divison na igreža

<sup>10</sup>Ermons, N pidi bos, na nomi di no Siñor Jesus Kristu, pa abos tudu

**1.1:** At 18.17 **1.2:** Jon 17.19; At 15.9 **1.4:** Rom 1.8

**1.5:** 2 Kor 8.7 **1.7:** Fil 3.20; Titu 2.13; 2 Ped 3.12

**1.8:** Fil 1.10; Kol 1.22; 1 Tes 3.13; 5.23; 2 Ped 3.14; Jud 24

**1.9:** Kap 10.13; 1 Tes 5.24; 2 Tes 3.3; Eb 10.23

**1.10:** Rom 12.16

bo fala un kusa son. Ka bo sedu divididu, ma bo uni na un pensamentu ku un sintidu. <sup>11</sup>Ña ermons, jinti di familia di Kloé kontan kuma bo tene jus na bo metadi; <sup>12</sup>kuma entri bos bo na purfia; un ta fala: “Ami i di Paulu;” utru: “Ami i di Apolu;” utru: “Ami i di Sefas;” utru inda ta fala: “Ami i di Kristu.” <sup>13</sup>Nta Kristu sta divididu? O Paulu krusifikadu pabia di bos? O bo batisadu na nomi di Paulu?

<sup>14</sup>N ta fala Deus obrigadu pabia N ka batisa nin un di bos; son Krispu ku Gaiu ku N batisa. <sup>15</sup>Asin ningin ka pudi fala kuma i batisadu na ña nomi. <sup>16</sup>I bardadi, N batisa tambi Stéfanos ku si familia, ma N ka lembra kuma N batisa mas algin. <sup>17</sup>Kristu ka mandan pa N batisa; i mandan pa N konta Bon Noba; i ka pa N kontal ku palabra di jiresa umanu, pa N ka lebsi krus di Kristu.

### **Kristu i puder ku jiresa di Deus**

<sup>18</sup>Palabra di krus i tulesa pa kilis ku na pirdi, ma pa nos ku na salba i puder di Deus. <sup>19</sup>I sta skritu kuma Deus fala:

“N na kaba ku jiresa di jinti jiru;

N na dana ntindimentu di jinti ntindidu.”

**1.12:** Kap 3.4; At 18.24 **1.12:** Jon 1.42 **1.13:** Ef 4.5  
**1.14:** At 18.8; Rom 16.23 **1.16:** Kap 16.15,17  
**1.17:** Kap 2.1,4-5,13; 2 Ped 1.16 **1.18:** Kap 2.14; At 17.18; Rom 1.4,16; 2 Kor 2.15-16 **1.19:** Jo 5.12; 12.20,24; Is 29.14; 44.25 **1.21:** Mat 11.25 **1.22:** Mat 12.38; 16.1; Jon 4.48 **1.23:** Is 8.14; Gal 5.11 **1.24:** V 18 **1.24:** Kol 2.3  
**1.27:** Sal 8.2; Mat 11.25; Tia 2.5 **1.28:** Kap 2.6; Rom 4.17  
**1.29:** Rom 3.27 **1.30:** Jer 23.5-6; Jon 17.19; Rom 4.25; 2 Kor 5.21; Ef 1.7; Fil 3.9 **1.31:** Jer 9.23-24  
**2.1:** Kap 1.17; 2 Kor 10.10

<sup>20</sup>Nunde ku jinti jiru sta? Nunde ku ntindidu sta? Nunde ku jinti diskutidur de mundu sta? Nta Deus ka mostra kuma jiresa de mundu i tulesa? <sup>21</sup>Deus na si jiresa fasi pa ka omis kunsil na se jiresa, ma i rezolvi usa anunsiu “tulu” pa salba kilis ku fia. <sup>22</sup>Judeus ta pidi milagri; gregus ta buska jiresa, <sup>23</sup>ma anos no ta konta aserka di Kristu krusifikadu, ku sedu ofensa pa judeus, tulesa pa gregus, <sup>24</sup>ma pa kilis ku Deus coma, judeus ku gregus, pa elis Kristu i puder di Deus, i jiresa di Deus. <sup>25</sup>Tulesa di Deus i mas jiresa di pekadur; frakesa di Deus i mas forsa di pekadur.

<sup>26</sup>Ermons, bo lembra kuma ku bo staba oca bo comadu. Bo ka ciu ku tenba jiresa de mundu, nin e ka ciu kilis ku tenba puder, nin fidalgus tambi ka ciu ba. <sup>27</sup>Deus kuji kil ku mundu coma tulu pa pasanta borgoña kilis ki jiru. Deus kuji tambi kil ku mundu coma fraku pa pasanta borgoña kilis ki forti. <sup>28</sup>Deus kuji kil ku mundu njuti, ku jinti oja kuma i ka bali, ku ka sedu nada, pa kaba ku kil ku sedu kusa, <sup>29</sup>pa ka nin un algin njata dianti di Deus. <sup>30</sup>Deus junta bos ku Jesus Kristu; i fasil jiresa pa nos. Pabia del tambi i fasinu justu, i santifikanu, i libertanu. <sup>31</sup>Asin, suma ki sta skritu: “Kil ku na njata, pa i njata na Siñor.”

### **Manera ku Paulu konta palabra na Korintu**

**2**<sup>1</sup>Ermons, oca ku N bai konta bos aserka di bardadi di Deus, N ka konta bos el ku palabras

kansadu, nin ku jiresa de mundu, <sup>2</sup>pabia nada N ka buska sibi na bo metadi, son Jesus Kristu, ku si mortu na krus. <sup>3</sup>Oca N staba ku bos, N staba fraku, N na tirmi ku medu. <sup>4</sup>Ña manera di fala ku kusa ku N ta konta ka seduba palabra di ngoda na jiresa di jinti, ma ku proba firmi di puder di Spiritu, <sup>5</sup>pa ka bo fe nkuña na jiresa di omi, ma pa i nkuña na puder di Deus.

### Jiresa di Deus

<sup>6</sup>Na bardadi no ta papia ku jiresa na metadi di krentis ku maduru na fe, ma i ka jiresa de mundu, nin di otridadis de mundu ku kada dia na pirdi puder. <sup>7</sup>No fala di jiresa di Deus ku sukundidu na si sigridu, ku Deus markaba pa no gloria antis di kumsada di mundu. <sup>8</sup>Nin un otridadi de mundu ka ntindil, pabia si e ntindilba, e ka na krusifikaba Siñor di Gloria. <sup>9</sup>Suma ki sta skritu:

“Kusas ku uju ka oja, oreja ka obi,  
nin i ka yentraba na korson di jinti,  
i ki kusas ku Deus purpara pa kilis ku amal.” <sup>10</sup>Deus pui si Spiritu pa mostranu ki kusas, pabia Spiritu ta garbata tudu kusas, te na fundura di Deus. <sup>11</sup>Kal omi ku ta ntindi kusas di omi si i ka spiritu di omi ku sta nel? Asin tamba kusa di Deus, ningin ka pudi ntindil, son Spiritu di Deus. <sup>12</sup>Anos no ka risibi spiritu di mundu, ma no risibi Spiritu ku bin

di Deus, pa no pudi ntindi kusas ku Deus danu di grasa.

<sup>13</sup>I e kusas ku no na fala; i ka ku palabra ku jiresa di mundu ta nsina, ma ku palabra ku Spiritu Santu ta nsina. No ta splika kusas spiritual pa kilis ki spiritual. <sup>14</sup>Na bardadi omi na si ntindimentu i ka pudi ntindi kusas di Spiritu di Deus, pabia e ta parsil tulesa. I ka pudi ntindi elis, pabia son Spiritu ku ta pul i ntindi. <sup>15</sup>Kil ki spiritual i ta ntindi balur di tudu, ma el, ningin ka pudi ntindil. <sup>16</sup>Kin ku ciga di kungsi pensamentu di Siñor pa i pudi nsinal? Ma anos no tene pensamentu di Kristu.

### Divison na igreža

**3** <sup>1</sup>Na bardadi, ermons, N ka puidiba papia ku bos suma ku N kustuma ta fasi ku jinti spiritual, ma N tenba ku papia ku bos suma jinti di mundu, o suma mininus na kamiñu di Kristu. <sup>2</sup>N tenba ku alimenta bos ku liti; i ka ku kumida risu, pabia bo ka pudi nguental. Te gosi inda bo ka pudi, <sup>3</sup>pabia bo na yanda inda suma jinti de mundu. Manera ku na bo metadi i ten inda nveža ku jus, bo ka sedu nan jinti di mundu? Bo ka na yanda suma utru jinti? <sup>4</sup>Si un fala kuma el i di Paulu,

**2.2:** Gal 6.14; Fil 3.8 **2.3:** At 18.1-18; 2 Kor 10.1,10; Gal 4.13 **2.4:** 1 Tes 1.5 **2.6:** Kap 14.20; Ef 4.13; Fil 3.15 **2.6:** Tia 3.15 **2.7:** Rom 16.25 **2.8:** Luk 23.34; At 13.27; 2 Kor 3.14 **2.9:** Is 64.4 **2.10:** Mat 16.17; Jon 14.26; 1 Jon 2.27 **2.11:** Dit 27.19; Rom 11.33 **2.13:** Kap 1.17 **2.14:** Mat 16.23; Rom 8.5 **2.15:** Dit 28.5; 1 Jon 4.1 **2.16:** Jo 15.8; Sal 25.14; Is 40.13; Jer 23.18; Jon 15.15 **3.2:** Jon 16.12; Eb 5.13; 1 Ped 2.2 **3.3:** Kap 1.11-12; Gal 5.20-21; Tia 3.16

utru fala kuma el i di Apolu, nta i ka ta parsi kuma bo sedu de mundu?

<sup>5</sup>Afinal, kin ki Apolu? Kin ki Paulu? Son servus di Deus ku bo konvertiba pabia delis. Kada un tarbaja konformi Siñor dal. <sup>6</sup>Ami N paranta, Apolu regua, ma i Deus ku fasil kirsi. <sup>7</sup>De manera, nin kil ku paranta o kil ku regua i ka nada, ma son Deus ku ta da kirsimentu. <sup>8</sup>Kil ku paranta ku kil ku regua, elis i un son. Kada un na risibi si pagamentu konformi si tarbaju. <sup>9</sup>Anos no sedu kumpañeris pa tarbaja juntu ku Deus.

Abos i labur di Deus, ku kasa ku Deus kumpu. <sup>10</sup>Ku don ku Deus dan, N tarbaja suma mestre di pedreru jiru. N pui alisersu; utru na kumpu kasa riba del. Kada kin jubi kuma ki na kumpu riba del, <sup>11</sup>pabia ningin ka pudi pui utru alisersu fora di kil ku pudu ja, ku sedu Jesus Kristu. <sup>12</sup>Si algin lantanda riba di ki alisersu un kasa di uru o prata, o pedra di balur, o madera o fenu o paja, <sup>13</sup>Dia di Kristu na mostra klaru tarbaju di kada kin. I fugu ku na mostral; ki fugu na proba tarbaju di kada kin pa jubi i kal koldadi. <sup>14</sup>Si kil ku algin kumpu riba di ki alisersu i ka kema na fugu, si dunu

ta risibi pagamentu, <sup>15</sup>ma kil ku si tarbaju kema na fugu i ta pirdi pagamentu; el i ta sedu salbu, ma suma kil ku pasa na fugu.

<sup>16</sup>Nta bo ka sibi kuma abos i santuariu di Deus, kuma Spiritu di Deus mora na bos? <sup>17</sup>Si algin dana santuariu di Deus, Deus ta dana si dunu tambi, pabia santuariu di Deus i son pa el; abos ku sedu ki santuariu.

<sup>18</sup>Ka ningin ngana si kabesa. Si algin na bo metadi kuda kuma i ten jiresa de mundu li, i minjor i fasi tulu pa i pudi sedu jiru di bardadi, <sup>19</sup>pabia jiresa de mundu i tulesa dianti di Deus, suma ki sta skritu: “Deus ta paña jirus na se nturjisa.” <sup>20</sup>I fala tambi: “Siñor kungsi pensamentu di jirus kuma i ka bali nada.” <sup>21</sup>Asin, ka ningin njata na omi si kumpañer. Tudu i di bos: <sup>22</sup>Paulu, Apolu, Sefas, e mundu, vida, mortu, gosi, ku futuro — tudu i di bos. <sup>23</sup>Abos bo sedu di Kristu; Kristu i di Deus.

### Nkargadu di Deus

**4** <sup>1</sup>Jinti dibi di ojanu suma servus di Kristu, nkargadu di sigridus di Deus. <sup>2</sup>Agora no na pera kuma un nkargadu dibi di ojadu fiel. <sup>3</sup>Si N na julgadu pa bos o pa kualker tribunal di omi, N ka mporta nada. Nin ami propi N ka ta julga ña kabesa. <sup>4</sup>N ka na sinti nada na ña konsiensia, ma es i ka proba kuma N ka kulpadu. I Siñor ku na julgan. <sup>5</sup>Asin, ka bo julga antis di ora. Bo pera tok Siñor bin. I na pui na lus kusa ku sukundi-du na sukuru. I na mostra kalkulus

3.5: Rom 12.3,6 3.6: At 18.1-11,27-28 3.6: Is 55.10  
 3.8: Jo 34.11 3.9: Mar 16.12; At 15.4; 2 Kor 6.1  
 3.9: Kol 2.7 3.9: Ef 2.20; 1 Ped 2.5 3.10: Rom 15.20  
 3.11: Is 28.16 3.13: Kap 4.5; 1 Ped 1.7; 4.12  
 3.16: Kap 6.19; 2 Kor 6.16; Ef 2.21-22; Eb 3.6 1 Ped 2.5  
 3.18: Is 5.21 3.19: Kap 1.20; Jo 5.13 3.20: Sal 94.11  
 3.21: Kap 1.12 3.22: 2 Kor 4.5,15 3.23: Kap 11.3;  
 Rom 14.8; 2 Kor 10.7; Gal 3.29 4.1: Luk 12.42; Titu 1.7;  
 1 Ped 4.10 4.4: Dit 21.2; 1 Jon 3.20 4.5: Mat 7.1;  
 Rom 2.1,16; 14.4,10,13; Apok 20.12 4.5: Rom 2.29;  
 2 Kor 5.10; 10.18

ku sta dentru di jinti. Dipus, Deus ta ngaba kada kin suma ki mersi.

### Njatansa di koríntius; otridadi di apostolu

<sup>6</sup>Ermons, pa N juda bos ntindi e kusas li ku manda N toma isemplu di mi ku Apolu, pa bo pudi sibi ke ku signifika e ditadu ku fala asin: “Ka bu pasanta mas di kil ku sta skritu,” pa ka bo yalsa un, bo baša utru. <sup>7</sup>Kin ku ta diferensiau? Ke ku bu tene ku bu ka dadu el? Si bu dadu el, ke ku manda bu na njata suma bu ka patidu nan el?

<sup>8</sup>Bo sta ja fartu! Bo sta riku! Sin nos, bo na rena! I ta bon pa bo rena na bardadi, pa no pudi rena juntu ku bos! <sup>9</sup>I parsin kuma anos apostolus, Deus punu tras. No sedu suma omis kondenadu pa muri na rua na uju di tudu mundu, na uju di anjus ku di jinti. <sup>10</sup>No sedu tulu pabia di Kristu, ma abos bo jiru na Kristu; anos i fraku ma abos bo forti. No njutidu; abos bo rispitudu. <sup>11</sup>Te gosi no na sufri fomi ku sedi. No bisti rataju, no bofotiadu, no ka tene kau sertu di mora. <sup>12</sup>No ta tarbaja ku no mon, no ta kansa. Ora ke falanu mal, no ta fala ben delis; ora ku no pirsigidu, no ta sufri; <sup>13</sup>ora ku no kobadu, no ta torna ku palabra mansu. Te gosi no na tratadu suma bora, suma muntudu di mundu.

<sup>14</sup>N ka skirbi asin pa N pasanta bos borgoña; N fasil pa N konsija bos suma ña fijus propi ku N ama. <sup>15</sup>Nin ku bo teneba des mil pursor na vida kriston, bo ka tene manga di pape, ma na kamiñu di Jesus

Kristu abos i ña fijus manera ku N konta bos Bon Noba. <sup>16</sup>E ku manda N na pidi bos pa bo remendan. <sup>17</sup>Pabia des N na manda bos Timótiu, ña fiju ku N ama; i fiel na Siñor; i ta juda bos lembra nsinamentu di kamiñu ku N ta yanda nel juntu ku Kristu, ku N ta nsina tambi na tudu parti, na kada igreža.

<sup>18</sup>Utrus na yanda sañadu, suma ku N ka na torna bai nunde bos, <sup>19</sup>ma si Siñor misti, N ka na tarda pa bai visita bos. Asin N ta kungsi kilis ku sta sañadu; i ka son pa palabra, ma N ta oja tambi se puder, <sup>20</sup>pabia renu di Deus i ka sedu di palabra ma di puder. <sup>21</sup>Kal ku bo misti? Pa N bai nunde bos ku mantampa, o ku amor ku spiritu mansu?

### Susidadi di Igreža di Korintu

**5** <sup>1</sup>Noba pajiga kuma na bo metadi i ten susidadi garandi dimas, ku nin kil ku ka kungsi Deus ka ta fasi, kuma utru sta juntu ku minjer di si pape. <sup>2</sup>Bo sta sañadu, nin bo ka fika tristi! Bo dibi di tira na bo metadi kil ku na fasi e kusa. <sup>3</sup>Ami di ña parti, N sta lunju na kurpu, ma pertu na spiritu. N julga ja kil ku fasi e kusa suma ku N sta la. <sup>4</sup>Bo ten ku

---

**4.6:** Kap 1.12 **4.7:** Jon 3.27; Tia 1.17; 1 Ped 4.10  
**4.8:** Apok 3.17 **4.9:** Rom 8.36 **4.10:** At 17.18; 26.24; 2 Kor 11.1,16-17,19,21; 12.6,11; 13.9 **4.11:** At 23.2; Rom 8.35; Fil 4.12 **4.12:** At 18.3 **4.12:** Mat 5.44; 1 Ped 2.23 **4.13:** Mis 3.45 **4.14:** 2 Kor 6.13; 1 Tes 2.11  
**4.15:** At 18.5,11; Gal 4.19; Filem 10 **4.16:** Kap 11.1; Fil 3.17; 1 Tes 1.6; 2.Tes 3.9; 1 Ped 5.3 **4.17:** At 16.1; Fil 2.19-22 **4.17:** Kap 11.2; 2 Tes 2.15 **4.18:** Kap 5.2  
**4.19:** At 19.21; 2 Kor 1.15 **4.20:** 1 Tes 1.5  
**4.21:** 2 Kor 10.2; 12.20; 13.10; Titu 1.13; 2.15  
**5.1:** Kum 35.22; Sir 18.8 **5.2:** Kap 4.18  
**5.4:** Mat 18.15-18

junta na nomi di no Siñor Jesus, ami na ña spiritu juntu ku bos. Na puder di no Siñor Jesus, <sup>5</sup>bo ta ntrega Sata-nas ki algin, pa kaba ku si kurpu, pa si alma pudi salba na Dia di Siñor.

<sup>6</sup>Bo njatamentu i ka bon. O bo ka sibi kuma un bokadu di fermentu ta orfa masa tudu? <sup>7</sup>Bo ten ku bota fora fermentu beju di pekadu, pa bo sedu limpu, pa bo sedu nobu masa sin fermentu, suma ku bo sedu na bardadi, pabia Kristu, ki no Karnel di Paskua, i sakrifikadu ja pa nos. <sup>8</sup>Asin no na fasi festival di lembransa di Paskua; i ka ku pon di fermentu beju di pekadu ku malisia, ma ku pon ku ka tene fermentu, pon di puresa ku bardadi.

<sup>9</sup>Na utru karta ku N skirbi bos, N fala pa ka bo junta ku kilis ku ta yanda na susidadi. <sup>10</sup>N ka fala kuma bo dibi di rapati ku tudu kilis de mundu ku ta yanda na mau vida, ku jinti ku risu mon, ku kilis ku ta furta, ku kilis ku ta adora idulus. Si i asin ba, i minjor bo sai na mundu! <sup>11</sup>Gosi N na skirbi bos pa ka bo junta ku kilis ku ta fala kuma e sedu ermons, ma e ta yanda na mau vida, o e ta fasi risu mon, o e adora idulus, o papia mal di utrus, camiduris, o furtaduris; ki koldadi, nin ka bo kume ku elis.

**5.5:** Jo 2.6; 1 Tim 1.20 **5.6:** Gal 5.9; 2 Tim 2.17

**5.7:** Kap 15.3; Sai 12.3,6-13; Is 53.7; Jon 1.29; 19.14;

1 Ped 1.19; Apok 5.6 **5.8:** Sai 12.15 **5.8:** Mat 16.6,12

**5.9:** 2 Kor 6.14; Ef 5.11 **5.10:** Jon 17.15; 1 Jon 5.19

**5.11:** Rom 16.17; 2 Tes 3.6; 2 Jon 10-11 **5.12-13:** Kol 4.5;

1 Tes 4.12; 1 Tim 3.7 **5.12-13:** Lei 13.5; 17.7; Mat 18.15-17

**6.2:** Dan 7.22; Mat 19.28; Luk 22.29-30; Apok 2.26; 20.4

**6.3:** 2 Ped 2.4 **6.7:** Mat 5.39-42 **6.10:** Gal 5.19-21;

Ef 5.5; 1 Tim 1.9-10; Apok 21.8; 22.15

<sup>12-13</sup>Kal diritu ku N ten pa julga kilis ku sta fora? I Deus ku na julga elis. Ma kilis ku sta dentru di bo igreža, i abos ku na julga elis. Bo tira ki omi mau na bo metadi.

### Keşas kontra ermons

**6** <sup>1</sup>Nta si un di bos tene un keşa kontra utru ermon, bu ta osa lebal danti di juis ki ka krenti, te pa bu pul danti di pobu di Deus? <sup>2</sup>O bo ka sibi kuma pobu di Deus na bin julga mundu? Si bo na bin julga mundu, nta bo ka kapas di julga kusa pikininu? <sup>3</sup>Bo ka sibi kuma no ten ku bin julga anjus? Ku fadi kusa ku pertensi e vida? <sup>4</sup>Nta si bo tene kualker palabra ne vida kontra bo kumpañer, bo ta lebal na kilis ku ka ten nin un lugar na igreža? <sup>5</sup>N fala es pa pasanta bos borgoña. Nta i ka ten nin un jiru na bo metadi ku pudi julga na metadi di si ermons? <sup>6</sup>Ma un ermon ta leba si ermon na justisa danti di kilis ki ka krentis!

<sup>7</sup>Na bardadi, si bo tene palabra entri bos ku na ciga na justisa, i mostra kuma bo kai ja. Ke ku manda bo ka ta sufri si algin fasi bos mal o bo sufri furtu, te pa bo leba bo ermon danti di justisa? <sup>8</sup>Abos propi bo ta fasi kusas injustu; bo ta furta, mesmu di bo ermons. <sup>9</sup>O bo ka sibi kuma kilis ku ta fasi mal ka na ten parti na renu di Deus? <sup>10</sup>Ka bo ngana bo kabesa, pabia kilis di mau vida, kilis ku ta adora idulus, kilis ku ta fasi pekadu seksual, kilis ki omoseksual, ladrons, kilis ku risu mon, camiduris, kobaduris di mal ku nturjons, e ka na ten parti

na renu di Deus. <sup>11</sup>Utrus na bo metadi seduba asin, ma bo labadu, bo santifikadu, bo ojadu justu na nomi di Siñor Jesus Kristu, pa Spiritu di no Deus.

### No kurpu i membru di Kristu

<sup>12</sup>Algin pudi fala kuma i sta libri pa fasi tudu kusa. I bardadi, ma i ka tudu kusa ki bon pa fasi. N sta libri pa fasi tudu kusa, ma N ka na disa nin un son manda na mi. <sup>13</sup>Utru pudi fala kuma kumida i pa stomagu, stomagu tambi i pa kumida. I bardadi, ma Deus na bin kaba ku elis tudu. Kurpu i ka pa mau vida; i pa Siñor; Siñor i pa kurpu. <sup>14</sup>Deus, ku lantanda Siñor di mortu, tambi i na lantandanu pa si puder.

<sup>15</sup>Bo ka sibi kuma bo kurpu fasi parti di kurpu di Kristu? Nta N na toma parti di kurpu di Kristu pa N fasil parti di algin di mau vida? Di nin un manera! <sup>16</sup>O bo ka sibi kuma, kil ku junta ku algin di mau vida, i ta junta un kurpu son ku el? Skritura fala kuma elis dus e ta forma un kurpu son. <sup>17</sup>Kil ku junta ku Siñor i ta sedu un ku el na spiritu.

<sup>18</sup>Bo kuri di mau vida. Tudu pekadu ku algin fasi, i fora di kurpu, ma kil ku kai na pekadu seksual, i na peka kontra si propi kurpu. <sup>19</sup>Nta bo ka sibi kuma bo kurpu i santuariu di Spiritu Santu ku Deus da bos, ku mora na bos? I ka abos ku tene bo kabesa, <sup>20</sup>pabia bo kumpradu ku bon pres. Bo ta tene bo kurpu pa gloria di Deus.

### Konsiju aserka di kasamenti

**7** <sup>1</sup>Gosi N na trata di kusas ku bo skirbin del. Bo fala kuma i bon pa omi ka kasa, <sup>2</sup>ma, pabia i ten manga di pekadu seksual, kada omi dibi di tene si propi minjer; minjer tambi si propi maridu. <sup>3</sup>Omi dibi di fasi si dever suma maridu. Minjer tambi dibi di fasi si dever suma minjer. <sup>4</sup>Minjer i ka dunu di si kurpu, ma i si maridu ku tenel. Omi tambi i ka dunu di si kurpu, ma i si minjer ku tenel. <sup>5</sup>Bo ka dibi di nega vontadi di njetru, son si bo konkorda pa lunjusi di njetru un bokadu, pa da tempu pa orason. Dipus, bo ta junta mas, pa ka Satanas tenta bos si bo ten falta di disiplinina.

<sup>6</sup>E kusa ku N konta bos, bo pudi fasil, ma i ka mandamentu, <sup>7</sup>pabia N mistiba pa tudu omi sedu suma mi, ma kada kin tene si don ku Deus dal, un de manera, utru di utru manera.

<sup>8</sup>N na fala pa solterus ku viuvus kuma i bon pa e fika suma mi, <sup>9</sup>ma si e ka pudi domina se kurpu, e dibi di kasa, pabia i minjor kasa di ki yardi ku vontadi di kasa.

<sup>10</sup>Pa kilis ku kasadu, N tene mandamentu, ma i ka di mi, i di Siñor, kuma minjer ka dibi di bandona si maridu, <sup>11</sup>ma si i bandonal, pa i

6.11: Kap 12.2; Ef 2.2,11; Titu 3.3; Eb 10.22

6.12: Kap 10.23 6.13: 1 Tes 4.4-5,7 6.14: Rom 6.5;

2 Kor 4.14; Ef 1.18-20 6.15: Kap 12.27; Rom 12.4-5

6.16: Kum 2.24 6.17: Jon 17.21-23; Ef 4.4

6.18: Rom 1.24 6.19: Kap 3.16 6.20: Kap 7.23; Eb 9.12;

1 Ped 1.18-19; Apok 5.9 7.3: Ef 5.22-33; 1 Ped 3.7

7.5: Sai 19.15; 1 Sam 21.4 7.8: Kap 9.5

7.9: 1 Tim 5.14 7.10: Mal 2.14-16; Mat 5.32; 19.4-6,9

fika sin kasa, o nta pa i torna ku si maridu. Maridu tambi pa ka i larga si minjer.

<sup>12</sup>Pa utrus N na fala (ma i ka suma i Siñor ku na fala): si un ermon tene minjer ki ka krenti, si minjer seta fika ku el, pa ka i largal. <sup>13</sup>Si minjer tambi tene maridu ki ka krenti, maridu seta fika ku el, pa ka i largal. <sup>14</sup>Maridu ki ka krenti i pertensi Deus pabia di si minjer. Minjer tambi ki ka krenti i pertensi Deus pabia di si maridu krenti. Si i ka asin ba, bo fijus e ka ta pertensiba Deus, ma na bardadi e pertensil. <sup>15</sup>Si maridu o minjer ki ka krenti misti separa di kil ki krenti, i pudi separa. Asin maridu o minjer ki krenti i ta fika libri di obrigason, pabia Deus comanu pa pas. <sup>16</sup>Abo minjer krenti, kuma ku bu pudi sibi si bu na salba bu maridu? O abo maridu, kuma ku bu pudi sibi si bu na salba bu minjer?

<sup>17</sup>Kada un dibi di kontinua vivi konformi don ku Siñor dal, suma ki staba oca Deus comal. Es ku N ta nsina na tudu igreža. <sup>18</sup>Si Deus coma un algin dipus di i sirkunsidadu, pa i fika asin. Si Deus coma algin ku ka sirkunsidadu, ka i sirkunsida. <sup>19</sup>Sirkunsison i ka nada. Tambi falta di sirkunsison i ka nada. Kusa ki importanti i pa obdisi mandamentu di Deus. <sup>20</sup>Kada un pa i fika na

stadu ki comadu nel. <sup>21</sup>Si bu comadu ocau katibu, ka bu kuda kila, ma si bu ten manera di fika libri, purbita. <sup>22</sup>Kil ku Siñor coma, mesmu ki sedu katibu, i omi libri ku pertensi Siñor. Kil tambi ku comadu, nin ki sedu libri, i katibu di Kristu. <sup>23</sup>Bo kumpradu pa bon pres. Ka bo torna sedu katibu di omi. <sup>24</sup>Ermons, kada un dibi di fika dianti di Deus suma ki staba oca i comadu.

<sup>25</sup>Aserka di kilis ki solteru, N ka tene ordi di Siñor, ma N ta da ña opinion, suma kin ki di fianza pabia di misericordia di Siñor. <sup>26</sup>Na un tempu di kansera suma no sta nel, N oja kuma un omi dibi di fika na manera ki sta. <sup>27</sup>Si bu tene minjer, ka bu buska separa del. Si bu ka tene, ka bu buska minjer, <sup>28</sup>ma si bu kasa, i ka kuma bu peka. Si bajuda kasa, tambi i ka peka, ma tudu ku kasa na sufri kansera na kurpu. I el ku N misti libra bos del.

<sup>29</sup>Ke ku N misti fala bos, ermons, kuma tempu sta kurtu. Gosi, kil ku tene minjer, pa i sta suma i ka tene. <sup>30</sup>Kilis ku na cora, pa e sedu suma e ka na cora; kilis ku sta kontenti pa e fasi suma e ka kontenti; kilis ku na kumpra, suma e ka na rakada. <sup>31</sup>Kilis ku ta okupa ku tarbaju de mundu li, pa ka e fika suma kin ku maradu nel, pabia mundu, na manera ki sta gosi, i ka na tarda, i na pasa.

<sup>32</sup>N ka misti pa bo tene manga di kudadi. Omi ku ka kasa, i ta kuda na tarbaju di Siñor, manera ki pudi pui Siñor kontenti, <sup>33</sup>ma omi kasadu i ta kuda na kusa di mundu, kuma ki na fasi si minjer kontenti.

**7.14:** Mal 2.15 **7.15:** Kap 14.33; Rom 15.33

**7.16:** 1 Ped 3.1 **7.17:** Kap 4.17 **7.19:** Rom 2.25;

Gal 5.6; 6.15; Kol 3.11; 1 Jon 3.24 **7.21:** Gal 3.28

**7.22:** Jon 8.36; Rom 6.18; Filem 16 **7.22:** Gal 5.13;

Ef 6.6; 1 Ped 2.16 **7.23:** Kap 6.20 **7.23:** Sir 25.42

**7.25:** V 6,40; 2 Kor 8.8,10 **7.25:** 1 Tim 1.12,16

**7.31:** Tia 4.14; 1 Ped 1.24; 1 Jon 2.17

<sup>34</sup>Asin i ta tene dus pensamentu. Un bajuda o un minjer ku ka kasa, i ta kuda son na tarbaju di Siñor. Si vontadi i pa ntregal si kurpu ku si spiritu, ma minjer kasadu, si kuda-di i son na kusas de mundu, kuma ki pudi fasi si omi kontenti.

<sup>35</sup>Suma ku N fala asin, N ka misti pa bo fika prezu, ma N misti juda bos pa bo fasi kusa diritu, limpu, ku bo ka ta fika mbaransadu ku nada, pa bo pudi sirbi Siñor.

<sup>36</sup>Na kasu di omi ku si bajuda ke ka kasa, si omi sinti kuma i ka na trata ben ku si bajuda, suma ki na pasa idadi di kasa, omi tambi i na sinti vontadi di kasa, i pudi kasa suma i misti; i ka na peka. <sup>37</sup>Ma si un omi sinti kuma i sta firmi na si pensamentu, sin ningin ka na pincal, i ten puder riba di si vontadi, si i rezolvi na si kabesa ki na disa si minina viržen, i ta fasi ben. <sup>38</sup>De manera, kil ku kasa ku si bajuda, i fasi ben, ma kil ku ka kasa, i fasi mas ben.

<sup>39</sup>Minjer kasadu i ta sta ligadu ku si omi nkuantu kila bibu, ma si i muri, minjer ta fika libri pa kasa ku kin ki misti, ma son si omi i krenti tambi, <sup>40</sup>ma i ta sta mas kontenti si i fika suma ki sta. Es i ña opinion, ma N kuda kuma N tene tambi Spiritu di Deus.

### Karni di ronia

**8**<sup>1</sup>Gosi N na ruspundi bo purguntá aserka di karni di ronia. I bardadi ku “anos tudu no ten ntindimentu”, suma ku bo fala, ma e ntindimentu i ta pui algin inci ku orgulyu. Amor ta juda. <sup>2</sup>Si algin kuda kuma i sibi kualker kusa, na bardadi

i ka sibi suma ki dibi di sibi, <sup>3</sup>ma si algin ama Deus, Deus ta kunsil.

<sup>4</sup>Kusa di kume karni di ronia, no sibi kuma idulu i ka nada na mundu di bardadi, suma ku bo fala. I ka ten utru deus fora di un son. <sup>5</sup>Nin ki ten kilis ku ta comadu deusis, na seu o na tera, pabia na bardadi i ten manga di deus ku manga di siñor, <sup>6</sup>ma pa nos i ten son un Deus, Pape, ku kumpu tudu kusas, ku no ta vivi pa el; i ten tambi un son Siñor, Jesus Kristu, ku tudu kusa kumpudu pa si mon, ku anos no na vivi pabia del.

<sup>7</sup>I ka tudu ku ten e ntindimentu. Utrus kustuma dimas ku idulu. Te gosi, ora ke na kume, e ta sinti suma ki karni i di idulu. Manera ku se konsiensia i fraku, e ta sinti susu. <sup>8</sup>I ka kusa di kumida ku na cigantanu mas pertu di Deus, pabia no ka ta fika pior si no ka kume; no ka ta fika minjor si no kume.

<sup>9</sup>Bo jubi pa bo liberdadi ka bin sedu motivu pa frakus mbaransa. <sup>10</sup>Si algin ku tene konsiensia fraku ojau, abo ku ten kuñisimentu, bu sinta na mesa na lugar di sirmonia, i ka ta dal koražen pa i kume karni di ronia? <sup>11</sup>Asin bu “ntindimentu” ta pui bu ermon fraku pa i pirdi, kil ku Kristu muri pa el. <sup>12</sup>Ne manera bo na peka kontra Kristu, suma ku bo na peka kontra bo ermons, bo

**7.34:** Luk 2.36-37; 1 Tim 5.5 **7.39:** Rom 7.2

**7.39:** 2 Kor 6.14 **8.1:** At 15.20 **8.1:** 1 Tim 6.4

**8.3:** Sai 33.12,17; Naun 1.7; Gal 4.9; 2 Tim 2.19

**8.4:** Lei 4.35,39; Ef 4.6 **8.6:** Mal 2.10; Jon 1.3; At 2.36; 17.28; Rom 11.36; Ef 4.5-6; Kol 1.16; Eb 1.2

**8.7:** Rom 14.1-2,14,23 **8.8:** Rom 14.17

**8.9:** Rom 14.13,20 **8.11:** Rom 14.15

**8.12:** Mat 25.40,45; At 9.4

na fidi se konsiensia fraku. <sup>13</sup>Asin, si i kumida ku na fasi ña ermon peka, nunca mas N ka na kume karni, pa ka N sedu kil ku na pui ña ermon pa i peka.

### Diritu di apostolu

**9**<sup>1</sup>N na punta bos: Ami i ka algin libri? Ami i ka apostolu? N ka oja Jesus no Siñor? Abos bo ka sedu risultadu di tarbaju ku N fasi pa Siñor? <sup>2</sup>Nin ku N ka sedu apostolu pa utru jinti, sertamenti N sedu pa bos, pabia i abos ku sedu proba kuma ami i apostolu, suma bo sedu di Siñor.

<sup>3</sup>Pa kilis ku na kritikan, es i ña difesa. <sup>4</sup>No ka ten diritu di kume no bibi? <sup>5</sup>No ka ten diritu di bai bias ku minjer krenti ku no kasa ku el, suma ki utru apostolus, ku ermons di Siñor, ku Pedru? <sup>6</sup>O son ami ku Barnabé ku ka ten diritu di disa di tarbaja pa no kabesa? <sup>7</sup>Kal soldadu ku ta paga dispesa pa si kabesa nkuantu i sta na tropa? Kin ku ta fasi orta, i ka ta kume si frutu? Kin ku ta bakia limarias, i ka ta purbita se liti?

<sup>8</sup>O N na fala asin suma ku omi ta fala? O lei ka fala tambi asin? <sup>9</sup>Na lei di Moisés i sta skritu pa ka mara boka di turu ku sta na tarbaju di masa arus. O Deus, son turu ki na kuda nel? <sup>10</sup>I ka fala tambi asin pabia di

nos? Sertamenti i pa nos tambi ki sta skritu, pabia kil ku labra ku kil ku na masa, e dibi di tarbaja ku speranza di oja se parti di arus ke kebra. <sup>11</sup>Si no sumia pa bos kusa spiritual, i ta sedu mal si no risibi di bos kusas material? <sup>12</sup>Si utrus ten diritu di pera e kusa di bos, anos tambi no ka ten mas diritu?

Ma anos, nunca no ka purbita de diritu. Pa kontrariu, no nguenta tudu pa ka no pui mpidimentu na Bon Noba di Kristu. <sup>13</sup>O bo ka sibi kuma kilis ku ta tarbaja na kasa di Deus e ta kume di oferta di kasa di Deus? I suma kilis tambi ku ta sirbi na altar, e ta toma se parti di karni di sakrifisiu. <sup>14</sup>Asin tambi Siñor manda pa kilis ku na konta Bon Noba pa e sustentadu nel.

<sup>15</sup>Ma ami, nin un de diritus li N ka purbita, nin N ka na skirbi e karta pa bo pudi fasi asin ku mi. I minjor N muri te pa algin fasi ña manera di ngaba ña kabesa pirdi balur. <sup>16</sup>Si N na konta Bon Noba, N ka ten roson di njata, pabia N sinti obrigason pa fasil. Ai di mi si N ka konta e Bon Noba! <sup>17</sup>Si N na fasil na ña propi vontadi, N ten ku pagadu, ma N fasil suma un dever, pabia i Deus ku dan el pa N fasi. <sup>18</sup>Agora kal ki ña pagamentu? I kontentamentu ku N ten pa konta Bon Noba sin kobra ningin, sin purbita ki diritu ku N ten suma kil ku ta konta Bon Noba.

<sup>19</sup>Ami i omi libri; N ka sedu katibu di ningin, ma N fasi ña kabesa katibu di tudu jinti pa N ngaña jinti mas ciu ku N pudi. <sup>20</sup>Oca ku N na tarbaja ku judeus, N yanda suma elis pa N

**8.13:** Rom 14.13; 2 Kor 11.29 **9.1:** Kap 15.8; At 9.3,15; 18.9; Gal 2.7-8; 1 Tim 2.7; 2 Tim 1.11 **9.1:** Kap 4.15  
**9.2:** 2 Kor 3.2; 12.12 **9.4:** 2 Tes 3.9 **9.5:** Mat 8.14; At 1.14 **9.7:** 2 Tim 2.3-4 **9.7:** Lei 20.6; Dit 27.18  
**9.9:** Lei 25.4; 1 Tim 5.18 **9.10:** 2 Tim 2.6  
**9.11:** Rom 15.27 **9.12:** V 15; At 18.3; 2 Kor 11.7-9; 12.13  
**9.13:** Sir 6.16; Num 5.9-10; Lei 18.1 **9.14:** Mat 10.10; Luk 10.7; Gal 6.6; 1 Tim 5.17 **9.15:** V 12 **9.16:** Rom 1.14  
**9.17:** Gal 2.7 **9.19:** Kap 10.33; 2 Kor 4.5; Gal 5.13; 1 Ped 3.1 **9.20:** At 16.3

pudi ngaña elis. Pa kilis ku sta bas di lei di Moisés, N bida suma ami tambi N sta bas del, pa N pudi ngaña elis, kontudu ami N ka sta bas del. <sup>21</sup>Si N sta ku jinti ku ka tene lei di Moisés, N ta bida suma algin ku ka tene ki lei, pa N pudi ngaña elis. I ka suma N ka tene lei di Deus, ma N sta bas di lei di Kristu. <sup>22</sup>Pa kilis ki fraku, N ta bida suma fraku tambi, pa N pudi ngaña elis. Asin N ta sedu tudu kusa pa tudu jinti, pa N salba utrus di kualker manera ku N pudi. <sup>23</sup>N ta fasi tudu e kusas pabia di Bon Noba, pa N pudi toma parti nel.

### Jugadur pa Kristu

<sup>24</sup>Bo sibi kuma, na disafiu, tudu ta kuri na kurida, ma i un son ku ta ngaña premiu. Bo kuri ku forsa pa bo pudi yangasal. <sup>25</sup>Tudu kil ku ta luta i ta pui disiplina forti na si kurpu pa i pudi ngaña premiu di koroa di floris ku ka ta tarda, ma anos no na luta pa kil ku ka ta dana nunca. <sup>26</sup>E ku manda ami N ta kuri ku uju na meta; N ta sukia, ma i ka na ar. <sup>27</sup>N ta kastiga ña kurpu, N ta pul bas di ña ordi pa, dipus di N konta utru jinti palabra di Deus, ami propi pa ka N bin fika raprobadu.

### Avisu kontra iran

**10** <sup>1</sup>Ña ermons, N misti pa bo ntindi kuma ku no garantis di antigu staba tudu guardadu bas di nuven, kuma ke pasa tudu na Mar Burmeju. <sup>2</sup>Asin na nuven ku mar, tudu batisadu suma kumpañoer di Moisés. <sup>3</sup>Tudu kume un

mesmu alimentu ku bin di Deus. <sup>4</sup>E bibi tambi un mesmu bibida ku bin di Deus, pabia e bibi di pedra spiritual ku na kumpaña elis. Ki pedra i Kristu. <sup>5</sup>Ma Deus ka kontenti ku manga delis. E ku manda se difuntus pajiga pa tudu parti di lala.

<sup>6</sup>Agora tudu e kusas sedu pa avisanu pa ka no kubisa kusas mau suma elis. <sup>7</sup>Ka bo sedu adoraduris di iran suma utru delis, suma ki sta skritu: “Pobu sintaba, e na kume, e na bibi, e lanta pa fasi parodia.” <sup>8</sup>Ka no fasi pekadu seksual suma ku utru delis fasi; e kai mortu na ki un dia vinti i tris mil jinti. <sup>9</sup>Ka no tenta Siñor, suma ku utru delis fasi; kobra mata elis. <sup>10</sup>Ka bo ñuninuni suma ku utru delis fasi, tok anju di mortu bin kaba ku elis.

<sup>11</sup>Tudu ki kusas kontisi pa un sinal, i skirbidu pa avisanu, anos ku na vivi na tempu ku kabantada di tudu sta pertu.

<sup>12</sup>Kil ku oja kuma i sta firmi, pa i toma sintidu pa ka i kai! <sup>13</sup>Tudu koldadi tentason ku bin pa bos i suma di tudu jinti, ma Deus i fiel; i ka na disa pa bo tentadu mas di ki kil ku bo pudi ku el; na ora di tentason i ta da tambi manera di kapli, pa bo pudi nguental.

**9.21:** Kap 7.22; Rom 2.12-14 **9.22:** Rom 15.1; 2 Kor 11.29

**9.22:** Kap 7.16 **9.24:** Eb 12.1 **9.25:** Fil 3.12-14;

1 Tim 4.8; 2 Tim 2.5; 4.7-8; Tia 1.12; 1 Ped 5.4; Apok 2.10;

3.11 **9.26:** Eb 12.2 **9.27:** 2 Kor 13.5-7 **10.1:** Sai 13.21;

14.22 **10.3:** Sai 16.14-15 **10.4:** Sai 17.6; Num 20.11

**10.4:** Jon 4.10; 7.37 **10.5:** Num 14.29,35; Sal 106.26

**10.6:** Num 11.4 **10.7:** Sai 32.6 **10.8:** Kap 6.18;

Num 25.1,9 **10.9:** Sai 17.2,7; Num 21.5-6; Lei 6.16

**10.10:** Sai 15.24; 16.2-9; 17.3; Num 14.2,26-38

**10.11:** Rom 15.4 **10.11:** Fil 4.5; Eb 10.25,37; 1 Jon 2.18

### Sirmonia di dimonius

<sup>14</sup>Asin ña kiridu ermons, bo kuri di adora iran. <sup>15</sup>N na fala ku bos suma jinti di ntindimentu. Abos propi bo pudi julga ke ku N na fala. <sup>16</sup>Kopu ku no usa na Sia di Siñor, ku no ta fala Deus obrigadu pa el, si no bibi nel no na toma parti di sangi di Kristu. Pon tambi ku no ta kebra, si no kumel no na toma parti di kurpu di Kristu. <sup>17</sup>Manera ki sedu un pon, anos tudu no ciu, ma no sedu un kurpu son, pabia no ta kume di ki un pon son.

<sup>18</sup>Bo jubi pa pobu di Israel. Nta kilis ku ta kume kusas di sakrifisiu, i ka elis ku ta sirbi na altar? <sup>19</sup>Nta N na fala kuma idulu o kusa sakrifikadu pa el i un kusa di balur? <sup>20</sup>Nau! Ke ku N na fala: Kusa ku jinti ki ka di Deus sakrifika i pa dimoniu, i ka pa Deus. N ka misti pa bo toma parti ku dimoniu. <sup>21</sup>Bo ka pudi bibi na kopu di Siñor, bo torna bibi na kopu di dimoniu. Bo ka pudi toma parti na mesa di Siñor, bo torna toma na mesa di dimoniu. <sup>22</sup>O no na pui Siñor pa i ten siumi? O anos i mas forti di ki el?

### Liberdadi di krenti

<sup>23</sup>“No sta libri pa fasi tudu kusa.” Asin ke fala, ma i ka tudu kusa ki bon. “No sta libri pa fasi tudu

**10.14:** 1 Jon 5.21 **10.15:** Kap 8.1 **10.16:** Kap 11.23-26; Mat 26.26-27; At 2.42 **10.17:** Rom 12.4-5 **10.18:** Sir 7.14 **10.19:** Kap 8.4 **10.20:** Lei 32.17; Sal 106.37; Apok 9.20 **10.21:** 2 Kor 6.15-16 **10.22:** Lei 32.21 **10.23:** Kap 6.12 **10.24:** Kap 13.5; Rom 15.1-2; Fil 2.4,21 **10.25:** Rom 14.2 **10.26:** Lei 10.14 **10.28:** Kap 8.10,12 **10.29:** Rom 14.16 **10.30:** 1 Tim 4.3 **10.31:** Kol 3.17; 1 Ped 4.11 **10.32:** Rom 14.13 **10.33:** Kap 9.19,22; Rom 15.1-2 **11.1:** Kap 4.16; Ef 5.1; 2 Tes 3.7 **11.2:** Kap 4.17; 7.17

kusa,” ma i ka tudu ku ta juda lantanda igreža. <sup>24</sup>Ningin ka dibi di buska si interes propi, ma i dibi di buska interes di utru.

<sup>25</sup>Bo pudi kume tudu kusa ku bindidu na fera, sin punta nada pabia di konsiensia, <sup>26</sup>pabia i Siñor ku tene tera ku tudu ku sta nel.

<sup>27</sup>Si un algin ku ka sedu krenti kumbida bos kume, si bo misti bai, bo ta kume tudu ki da bos, sin punta nada pabia di konsiensia, <sup>28</sup>ma si algin fala bos kuma e kumida i di ronia, ka bo kumel, pabia di kil ku konta bos, tambi pa konsiensia. [Tera i di Siñor, ku tudu ku sta nel.] <sup>29</sup>N ka na fala pabia di bo konsiensia, ma di kil ku konta bos.

Algin pudi punta: “Nta pabia di ke ku konsiensia di utru ta rugula ña liberdadi? <sup>30</sup>Si N fala Deus obrigadu pa ña kumida, pabia di ke ku algin ta kritikan na kil ku N fala Deus obrigadu pa el?”

<sup>31</sup>Mbon, nin si bo na kume, o bo na bibi, o bo na fasi kualker utru kusa, bo fasi tudu pa gloria di Deus. <sup>32</sup>Bo yanda na bon manera, ku bo ka ta pui nin judeu, nin gregu, nin igreža di Deus pa i kai. <sup>33</sup>Suma mi tambi, N ta fasi forsa pa N fasi tudu pa pui tudu jinti kontenti. N ka ta buska kil ki bon son pa mi, ma pa manga di jinti, pa e pudi salba.

**11** <sup>1</sup>Bo remendan, suma ku N ta remenda Kristu.

### Aserka di kubri kabesa

<sup>2</sup>Ami N ngaba bos pabia na tudu bo ta lembra di mi, suma ku bo obdisi nsinamentu ku N pasanta

pa bos, <sup>3</sup>ma N misti pa bo sibi kuma i Kristu ki kabesa di tudu omi; omi tambi i kabesa di minjer; Deus i kabesa di Kristu. <sup>4</sup>Tudu omi ku na ora o i na anunsia rekadu di Deus ku kabesa kubridu, i ta tisi borgoña pa si kabesa. <sup>5</sup>Tudu minjer ku na ora o i na anunsia rekadu di Deus sin kubri kabesa, i ta tisi tambi borgoña riba di si kabesa, pabia i ta sta suma i rapa kabesa. <sup>6</sup>Asin si minjer ka kubri kabesa ku veu, i minjer i tiskia kabelu. Si pa un minjer tiskia kabelu, o i rapa, i borgoña, i minjer i kubri ku veu. <sup>7</sup>Un omi ka dibi di kubri kabesa, pabia el i parsensa di Deus; i spiju di si gloria; ma minjer i spiju di gloria di omi. <sup>8</sup>Omi ka kumpudu di minjer, ma minjer kumpudu di omi. <sup>9</sup>Nin omi ka kumpudu pabia di minjer, ma minjer kumpudu pabia di omi. <sup>10</sup>E ku manda, pabia di anjus, minjer dibi di kubri kabesa pa mostra kuma i sta bas di si omi.

<sup>11</sup>Ma dianti di Siñor omi pirsisa di minjer, minjer pirsisa di omi tambi, <sup>12</sup>pabia, suma ku minjer sai na omi, asin tambi ku omi ta nasi di minjer, ma tudu bin di Deus.

<sup>13</sup>Bo kudal entri bos propi, si i bon pa minjer ora Deus sin kubri kabesa. <sup>14</sup>Naturesa propi i mostranu kuma, si un omi tene kabelu kumpridu, i borgoña pa el, <sup>15</sup>ma si i minjer ku tene kabelu kumpriidu, i bonitu, pabia i dadu kabelu pa kubril suma veu. <sup>16</sup>Si algin misti diskuti e kusa li, N pudi kontal kuma no ka ten e kustumu, nin igrežas di Deus ka tenel.

### Sia di Siñor

(*Mat 26.26-29; Mar 14.22-25;*

*Luk 22.14-20)*

<sup>17</sup>Ne kusa ku N na bin fala gosi, N ka pudi ngaba bos, pabia bo juntamentu i ka pa ben, ma i pa mal. <sup>18</sup>Purmeru kusa, N obi kuma, si bo junta pa adora Deus, bo ta dividi grupus. Na un parti N fia kuma i bardadi. <sup>19</sup>(Sertamenti i pirsis pa bo ten purfia na bo metadi, pa pudi kunsidu kilis ku sta na bardadi.) <sup>20</sup>E ku manda, si bo junta na un lugar, i ka Sia di Siñor ku bo na kume, <sup>21</sup>pabia, ora ku bo na kume, kada un ta jumna si kumpañer pa kume di sil; utru ta fika ku fomi, utru ta cami. <sup>22</sup>Nta bo ka tene bo kasas pa kume, pa bibi nel? O bo ta nju-ti igreža di Deus pa pui na borgoña kilis ku ka tene nada? Ke ku N pudi fala bos? Pa N ngaba bos? Nes li N ka pudi ngaba bos.

<sup>23</sup>N risibi di Siñor ki nsinamentu ku N pasanta pa bos, kuma Siñor Jesus, na noti ku Judas falsial, i toma pon, <sup>24</sup>i fala Deus obrigadu, i kebral, i fala: “Es i ña kurpu ki pa bos. Bo fasi asin pa ña lembransa.” <sup>25</sup>Na mesmu manera, dipus di sia, i toma kopu, i fala: “E kopu i nobu kontratu seladu ku ña sangi. Kada bias ku bo bibi nel, bo fasil pa lembra di mi.” <sup>26</sup>Kada bias ku bo kume e pon, bo bibi ne kopu, bo ta konta mortu di Siñor te ki bin.

**11.3:** Kap 3.23; Kum 3.16; Ef 5.23-24; 1 Ped 3.1

**11.7:** Kum 1.26-27; 5.1; 9.6 **11.9:** Kum 2.18,21-23

**11.10:** Kum 24.65 **11.11:** Gal 3.28 **11.12:** Rom 11.36

**11.18:** Kap 1.10-13 **11.19:** Mat 18.7; At 20.30; 2 Ped 2.1;

1 Jon 2.19 **11.21:** 2 Ped 2.13; Jud 12 **11.22:** Tia 2.6

**11.23:** Kap 15.3 **11.26:** At 1.11

<sup>27</sup>Asin, si algin kume pon di Siñor, o i bibi na si kopu, na mau manera, i na peka kontra kurpu ku sangi di Siñor. <sup>28</sup>E ku manda, kada un dibi di jubi si korson purmeru; dipus i ta kume pon, i bibi na kopu, <sup>29</sup>pabia si i kume, i bibi, i ka rapara kurpu di Siñor, i ta kume i bibi pa si propi kondenason. <sup>30</sup>E ku manda manga di bos sta fraku, duenti, tok utrus muri ja. <sup>31</sup>Si no ta seta jubi no propi korson, no ka ta ciga di julgadu. <sup>32</sup>Ora ku Siñor na julganu, i na disiplinanu pa ka no bin julgadu ku kilis di mundu.

<sup>33</sup>Asin ña ermons, ora ku bo junta pa kume, bo pera ñutru. <sup>34</sup>Si algin tene fomi, pa i kume na si kasa, pa ora ku bo junta, bo ka kai na kondenason. Restu di kusas, ora ku N ciga la, N ta ruma elis.

### Koldadi dons di Spiritu

**12** <sup>1</sup>Gosi, ermons, N na ruspundi kil ku bo skirbi aserka di dons di Spiritu Santu, pabia N misti pa bo ntindil diritu. <sup>2</sup>Bo sibi kuma, oca bo ka kunsiba inda Deus, bo ta rolantadu di manga di manera pa irans ku ka pudi fala nada. <sup>3</sup>Asin N misti pa bo ntindi kuma, algin ku na fala na puder di Spiritu di Deus ka ta

fala kuma Jesus maldisuadu. Ningin tamba ka pudi fala: “Jesus i Siñor,” si i ka papia na puder di Spiritu Santu.

<sup>4</sup>I ten manga di koldadi dons, ma i mesmu Spiritu ku ta da elis. <sup>5</sup>I ten manga di koldadi sirvis, ma Siñor i ki un son. <sup>6</sup>I ten manga di koldadi tarbaju, ma i mesmu Deus ku ta tarbaja tudu kusa na tudu jinti. <sup>7</sup>Spiritu ta mostra na kada un na manera differenti, ma pa ben di tudu, <sup>8</sup>pabia Spiritu ta da un algin palabra di jiresa; i ta da utru palabra di kuñisimentu; <sup>9</sup>mesmu Spiritu ta da utru fe; i ta da utru puderis di kura; <sup>10</sup>utru tamba, Spiritu ta dal puder di fasi milagris; utru, i ta dal don di anunsia rekadu di Deus; utru, i ta dal puder di rapara koldadi spiritu; utru, i ta dal puder pa fala na linguas ki ka obi; utru, i ta dal manera di splika ki linguas. <sup>11</sup>Tudu e dons i di un mesmu Spiritu. I el ku ta da kada kin na manera ki misti.

### Un kurpu ku tudu si partis

<sup>12</sup>Kristu i suma un kurpu son ku tene manga di parti. Kontudu e ciu, ma e ta junta pa e sedu un kurpu son. <sup>13</sup>Anos tudu no batisadu na un Spiritu, pa no forma un kurpu son, judeus ku gregus, katibus ku kilis ku sta libri. I ki un Spiritu ku dadu pa nos tudu no bibi nel.

<sup>14</sup>Kurpu i ka un parti son, ma manga del. <sup>15</sup>Pe pudi fala: “Suma ami i ka mon, N ka sedu di kurpu,” ma i pertensi kurpu na mesmu. <sup>16</sup>Oreja pudi fala: “Ami i ka uju; N ka sedu di kurpu,” ma i pertensi kurpu na mesmu. <sup>17</sup>Si kurpu tudu

**11.27:** Kap 10.21; Jon 13.27 **11.28:** 2 Kor 13.5; Gal 6.4  
**11.29:** Jon 6.51 **11.29:** Rom 13.2 **11.31:** Sal 32.5;  
 1 Jon 1.9 **11.32:** Jo 5.17; Sal 94.12; Am 3.2; Eb 12.5-11  
**11.34:** Kap 4.19; Titu 1.5 **12.2:** Sal 115.5  
**12.3:** Mat 16.15-16; Mar 9.39; 1 Jon 4.2-3 **12.4:** V 11;  
 Kap 7.7; Rom 12.6-8; Ef 4.4-7,11; Eb 2.4 **12.7:** Kap 14.26;  
 1 Ped 4.10-11 **12.8:** Kap 2.6-7; 2 Kor 8.7 **12.9:** Kap 13.2;  
 Mat 17.19-20; 2 Kor 4.13 **12.9:** Mar 16.18; Tia 5.14-15  
**12.10:** Kap 13.1; Mar 16.17; At 2.4; Gal 3.5 **12.11:** V 4  
**12.12:** Rom 12.4-5 **12.13:** Rom 6.3-5; Gal 3.28; Ef 2.13;  
 Kol 3.11 **12.13:** Rom 3.29; 10.12-13

sedu son uju, kuma ku algin pudi obi? Si tudu seduba oreja, kuma ku algin pudi sinti ceru? <sup>18</sup>Deus pui kada parti di kurpu na si lugar propi, konformi i misti. <sup>19</sup>Si tudu seduba un parti son, kurpu ka na tenba, <sup>20</sup>ma na bardadi, i ten manga di parti, ku ta forma un kurpu son.

<sup>21</sup>Uju ka pudi fala mon: “N ka pirsisa di bo.” Nin kabesa ka pudi fala pe asin: “N ka pirsisa di bos.” <sup>22</sup>Ki parti di kurpu ku parsi mas fraku, no ka pudi fika sin el. <sup>23</sup>Ki partis di kurpu ku no oja kuma e ka ten garandi balur, i elis ku no ta trata ku mas rispitu. Ki partis na nos ku ka bonitu suma utrus, no ta trata elis mas diritu, <sup>24</sup>na un manera ku ki partis mas bonitu ka ta pirsisa del. Deus forma kurpu na un manera ku ki partis ku ka bonitu tene maitu mas rispitu, <sup>25</sup>pa ka kurpu sedu divididu, ma pa partis tene mesmu tratu un pa utru. <sup>26</sup>Asin, si un parti na sufri, tudu ta sufri ku el. Si un parti ngabadu, tudu ta kontenti juntu ku el.

<sup>27</sup>Abos ku sedu kurpu di Kristu; kada un di bos sedu un parti di si kurpu. <sup>28</sup>Na purmeru lugar Deus pui na igreža apostolus; na sugundu lugar anunsiaduris; na terseru, pursoris; dipus, kilis ku ta fasi milagris; dipus, kilis ku dadu puder di kura, o di juda utrus, o di gubernana na igreža, o di fala linguas ke ka obi. <sup>29</sup>I ka tudu ki apostolu, nin anunsiadur, nin pursor. I ka tudu ku ten puder pa fasi milagri, <sup>30</sup>o pa kura duentis, pa fala lingua ki ka obi, o pa splika lingua. <sup>31</sup>Bo buska ku mpeñu ki dons mas importanti.

Gosi N na mostra bos kamiñu ki mas bon di tudu.

### Amor

**13** <sup>1</sup>N pudi papia linguas di omis, o te di anjus, ma si N ka ten amor, N ta sedu suma sinu ku na somna, o suma feru ku na majadu. <sup>2</sup>N pudi tene don di anunsia rekadu di Deus, N kungsi tudu kusa sukundidu, N sibi tudu kusa; N pudi ten garandi fe pa N mundanta montis, ma si N ka ten amor, N ka na sedu nada. <sup>3</sup>N pudi pati pobris tudu ku N tene; N pudi da ña kurpu propi pa i kemadu, ma si N ka ten amor, N ka na purbita nada.

<sup>4</sup>Amor i sufridur, i bon. Amor i ka nvežosu; amor ka ta njata, i ka orgulyosu, <sup>5</sup>i ka mal-kriadu, i ka intereseru, i ka lestu di raiba, i ka rankorosu, <sup>6</sup>i ka ta kontenti ku mal di utru, ma i ta kontenti ku kusa di bardadi. <sup>7</sup>I ta sufri tudu; si fe, si speransa ku si pasensa nunca ka ta kaba.

<sup>8</sup>Amor nunca i ka ta falia, ma si anunsius ten, e na kaba. Si linguas ten, e na para. Si kuñisimentu ten, i na disparsi, <sup>9</sup>pabia no kuñisimentu ku no anunsius i ka kompletu, <sup>10</sup>ma ora ku kil ku kompletu ciga, kil ku ka kompletu na pirdi.

<sup>11</sup>Ocan mininu N ta papiaba suma mininu, N ta sinti suma mininu, N ta kuda suma mininu, ma ocan garandi, N kaba ku kusas di mininesa.

**7.19:** Jon 4.14; 7.37 **12.26:** Rom 12.15 **12.27:** V 12

**12.28:** At 6.1-6; 13.1; Rom 12.6-8; Ef 2.20; 3.5; 4.11;

1 Tim 5.17; Eb 13.17 **12.31:** Kap 14.1,39

**13.2:** Kap 12.8-10 **13.4:** Dit 10.12; 1 Ped 4.8

**13.5:** Kap 10.24 **13.6:** Rom 1.32 **13.6:** 2 Jon 4

**13.7:** 2 Tim 2.24

<sup>12</sup>Kil ku no na oja gosi, i suma bo na oja fusku na spiju, ma na tempu ku na bin bin, no na oja kara ku kara. Kil ku N sibi gosi, i son un kusa lebi, ma na ki tempu N na kungsi kusa klaru, suma ku Deus kunsin.

<sup>13</sup>Gosi inda no na fika ku e tris kusa: fe, speransa ku amor, ma mas garandi di tudu i amor.

### Mas aserka di dons di Spiritu

**14** <sup>1</sup>Bo pui amor na purmeru lugar, ma bo buska ku mpeñu dons di Spiritu, prinsipalmente puder di anunsia rekadu di Deus. <sup>2</sup>Kil ku na fala na lingua ki ka obi i ka na fala pa jinti, ma pa Deus, pabia ningin ka ta ntindil. Na puder di Spiritu i na fala bardadi sukundidu, <sup>3</sup>ma kil ku na anunsia rekadu di Deus i na fala pa jinti, pa lantanda elis, pa konsija elis, pa da elis koražen. <sup>4</sup>Kil ku na fala na lingua strañu i ta juda son si kabesa, ma kil ku ta anunsia rekadu di Deus i ta juda tudu jinti na igreža.

<sup>5</sup>N ta kontenti si abos tudu bo ta fala lingua strañu, ma N ta mas kontenti si bo na anunsia, pabia kil ku na anunsia rekadu di Deus i ten mas purbitu di ki kil ku na fala lingua strañu; son si i pudi splika tambu kusa ki fala na lingua, pa igreža pudi lantandadu. <sup>6</sup>Ermons, si N bai nunde bos, N fala na lingua strañu, kal purbitu ku N pudi sedu pa bos si N ka konta bos kusa ku Deus mostrap,

o sklarisi bos un kusa, o anunsia rekadu di Deus, o nsina?

<sup>7</sup>Bo pui pensa na kusa sin vida, suma instrumentu ku ta tokadu, flauta o viola. Si nota di musika ka tokadu klaru, kuma ku algin pudi ntindi kantiga ki na toka? <sup>8</sup>Si omi ku na toka korneta ka toka nota klaru, kin ku na purpara pa gera? <sup>9</sup>Di mesmu manera, kuma ku algin na ntindi ke ku bo na fala si bo na papia un lingua ku ka kunsidu? I ta sta suma bo na papia na bentu. <sup>10</sup>I ten manga di koldadi lingua na mundu, ma elis tudu e ten se sintidu. <sup>11</sup>Si N ka ntindi lingua ku na faladu, ki algin i ta sedu strañu pa mi; ami tambu N ta sedu strañu pa el. <sup>12</sup>Ja ku bo dija dons di Spiritu, bo buska manera di usa mas ciu kilis ku ta lantanda igreža.

<sup>13</sup>Algin ku ta papia lingua strañu dibi di ora pa Deus dal puder di splika ke ki na papia. <sup>14</sup>Si N ora na lingua strañu, ña spiritu na ora, ma ña ntindimentu ka na toma parti. <sup>15</sup>Ke ku N na fasi gora? N na ora ku spiritu, ma tambu N na ora ku ntindimentu. N na kanta ku spiritu; tambu N na kanta ku ntindimentu. <sup>16</sup>Si bu fala Deus obrigadu son na spiritu, si algin ku falta di ntindimentu sta la, kuma ki pudi fala Amen riba di bu gardisimentu si i ka ntindi ke ku bu na fala? <sup>17</sup>Na bardadi bu gardisimentu pudi sedu bon, ma i ka na juda utru jinti.

<sup>18</sup>N na fala Deus obrigadu pabia N ta papia lingua strañu mas di ki kualker di bos, <sup>19</sup>ma na runion di igreža N mas misti papia sinku

**13.12:** 2 Kor 3.18; 5.7; 1 Jon 3.2 **13.13:** Mat 22.37-39  
**14.1:** Sir 19.18 **14.1:** Kap 12.31 **14.12:** Kap 12.7  
**14.15:** Ef 5.19

palabra ku na ntindidu, pa pudi nsina utrus, di ki des mil palabra na lingua strañu.

<sup>20</sup>Ermons, ka bo sedu mininus na ntindimentu; bo sedu mininus na fasi mal, ma na ntindimentu bo sedu jinti maduru. <sup>21</sup>I sta skritu na lei kuma:

“Siñor fala: ‘Ami N na papia ku e pobu na boka di omis ku ta papia utru lingua, ku sedu na boka di stranjerus, ma mesmu asin e ka na obin.’”

<sup>22</sup>Asin, lingua strañu i ka sinal pa krenti, ma i pa kilis ki ka krenti. Anunsiu i ka sinal pa kilis ki ka krenti, ma pa krenti.

<sup>23</sup>Asin, si tudu igreža junta na un lugar, si tudu na papia lingua strañu, i yentra un algin ku ka ten ntindimentu o ki ka krenti, nta i ka ta fala bo tulu? <sup>24</sup>Ma si tudu na anunsia rekadu di Deus, si un algin ku ka ten ntindimentu o ki ka krenti yentra, palabra di kada un ki na obi i na konvensil, i na julgal; <sup>25</sup>sigridus di si korson na bin pa lus. Asin i ta mborka na con, i adora Deus, i diklara: “Na bardadi, Deus sta na bo metadi!”

### Ordi na kultu

<sup>26</sup>Pa kabanta, ermons, ora ku bo junta pa adorason, un ta tene kantiga, utru tene nsinamentu, utru ta konta kusa ku Deus mostral, utru ta fala lingua strañu, utru ta splikal. Bo fasi tudu pa ajuda di igreža. <sup>27</sup>Pa kilis ku na papia lingua strañu, son dus o tris ku na papia, un di kada bias;

tambi pa i ten kil ku na torna palabra. <sup>28</sup>Si i ka ten kin ku na splikal, minjor pa ka i papia pa tudu igreža, ma son pa el ku Deus. <sup>29</sup>Pa anunsiaduris, dus o tris pudi fala; restu ta jubi palabra diritu. <sup>30</sup>Si Deus mostra un kusa pa algin ku sinta la, kil ku na papia dibi di kala. <sup>31</sup>Abos tudu bo pudi anunsia rekadu di Deus, un di kada bias, pa tudu pudi prindi, e fika animadu. <sup>32</sup>Anunsiaduris ten ku rugula se don di anunsiu, <sup>33</sup>pabia Deus i ka Deus di kunfuson, ma i Deus ku ta da pas.

Suma na tudu juntamentu di pobu di Deus, <sup>34</sup>minjeris dibi di kala na runion, pabia e ka tene lisen-sa di papia, ma i pa e fika sužetu, suma ku lei fala. <sup>35</sup>Si e misti sibi kualker kusa, e ta bai punta se maridu na kasa, pabia i borgoñosu pa minjer papia na igreža.

<sup>36</sup>Nta palabra di Deus kumsa ku bos? I bin son pa bos? <sup>37</sup>Si algin oja kuma el i anunsiadur, o i tene don spiritual, i dibi di ntindi kuma e kusas ku N skirbi bos i mandamentu di Siñor, <sup>38</sup>ma si algin ka liga ku e kusas, ka bo liga ku si dunu.

<sup>39</sup>Asin ermons, bo buska ku mpeñu pa anunsia; ka bo tuji jinti papia lingua strañu. <sup>40</sup>Tudu dibi di fasidu diritu, ku ordi.

### Resureison di mortu

**15** <sup>1</sup>Gosi, ermons, N na lem-branta bos di Bon Noba ku

**14.20:** Mar 10.14-15; Rom 16.19; Ef 4.14; Eb 5.12-13

**14.21:** Is 28.11-12 **14.23:** At 2.13 **14.25:** Is 45.14;

Zak 8.23 **14.26:** Kap 12.7; Rom 14.19; 2 Kor 12.19;

Ef 4.11-12 **14.29:** 1 Jon 4.1 **14.34:** Kap 11.3; Ef 5.24;

1 Tim 2.11-12 **14.37:** 2 Kor 10.7

**14.39:** V 1; Kap 12.31; **15.1:** Rom 5.2

N konta bos, ku bo risibi, kil ku bo firma nel, <sup>2</sup>kil tambi ku tisi bos salbason, si bo rakadal suma ku N konta bos el. Si i ka asin, bo konverti pa nada. <sup>3</sup>Kusa mas importanti i es: N pasanta pa bos kil ku N risibi, kuma Kristu muri pa no pekadu suma ku Skritura fala. <sup>4</sup>I nteradu; na terseru dia i lantandadu di mortu, suma ku Skritura fala. <sup>5</sup>Pedru ojal; dipus, dozi apostolu ojal; <sup>6</sup>dipus, mas di kiñentus ermon ojal di un bias. Mas parti delis sta bibu inda, ma utrus muri ja. <sup>7</sup>Dipus, Tiagu ojal; dipus tudu apostolus.

<sup>8</sup>Na fin di tudu i parsi pa mi tambi, mesmu ku N sedu suma algin ku padidu fora di tempu. <sup>9</sup>Ami N mas ka ten importansia di ki tudu apostolus, nin N ka mersi pa N comadu asin, pabia N pirsigi igreža di Deus, <sup>10</sup>ma fabur di Deus fasin kil ku N sedu. Deus ka dan e fabur sin purbitu, pabia N tarbaja mas di ki elis tudu. Ma i ka ami; i fabur di Deus ku na tarbaja ku mi. <sup>11</sup>O i ami, o i elis, i es ku no ta konta; i el ku bo obi, bo seta.

<sup>12</sup>Suma i es ku no na konta, kuma Kristu lantandadu di mortu, kuma ku utrus di bos ta fala kuma resureison di mortu ka ten? <sup>13</sup>Si resureison di mortu ka ten, Kristu

tambi ka lantandadu. <sup>14</sup>Si Kristu ka lantandadu, no ka tene nada di konta; abos tambi bo ka tene nada di fia nel. <sup>15</sup>Anos tambi, no ta parsi suma no na konta mintida aserka di Deus, pabia no fala kuma i lantanda Kristu di mortu, ma si na bardadi mortus ka ta lantandadu, tambi Deus ka lantanda Kristu di mortu. <sup>16</sup>Si mortus ka ta lantandadu, tambi Kristu ka lantandadu. <sup>17</sup>Si Kristu ka lantandadu, bo fe ka bali nada; bo sta inda na bo pekadu; <sup>18</sup>tambi kilis ku muri ku fe na Kristu e sta pirdidu. <sup>19</sup>Si Kristu danu speransa son pa e mundu, no koitadi mas di ki tudu jinti!

<sup>20</sup>Ma na bardadi Kristu lantandadu di mortu, suma purmeru di kilis ku muri. <sup>21</sup>Di mesmu manera ku un omi tisi mortu pa mundu, asin tambi un omi tisi resureison di mortu. <sup>22</sup>Suma ku tudu jinti muri pabia e liga ku Adon, asin tambi ku tudu na tene vida pabia e liga ku Kristu. <sup>23</sup>Kada kin na lantandadu na si ordi: Kristu purmeru; dipus, ora ki bin, kilis ki di sil. <sup>24</sup>Dipus, fin na bin. Kristu na kaba ku tudu forsa ku otridadi ku puder; i na ntrega renu pa Deus Pape. <sup>25</sup>Kristu ten ku rena te ora ku Deus pui tudu inimigus bas di si pe. <sup>26</sup>Ultimu inimigu ku na kabadu ku el i mortu. <sup>27</sup>Palabra di Deus fala kuma i pui tudu kusa bas di si pe. Manera ki fala “tudu kusa” i klaru ki ka na pui na konta kil ku pui tudu kusa bas del, ku sedu Deus. <sup>28</sup>Ora ku tudu kusa fika bas di Kristu, el propi, Fiju, i na fika bas di kil ku pui tudu kusa bas

15.3: Kap 11.2,23 15.3: Luk 24.27,46; At 3.18

15.4: At 2.24-31 15.5: Luk 24.34,36; At 1.3

15.8: At 9.4,17; 22.13-14,18 15.9: At 8.3

15.10: Ef 3.7-8 15.10: 2 Kor 11.23 15.10: Mat 10.20;

Gal 2.8,20 15.12: Mat 22.23 15.17: Rom 4.25

15.20: V 23; Ef 1.20; Kol 1.18; 1 Tes 4.14-17

15.21: Jon 11.25; Rom 5.12,17; 6.23 15.23: V 20;

2 Kor 4.14 15.25: Sal 110.1; At 2.34-35

15.26: 2 Tim 1.10; Eb 2.14; Apok 20.14 15.27: Mat 28.18;

1 Ped 3.22 15.28: Kap 3.23; 11.3; Jon 14.28; Fil 3.20-21

del, pa Deus pudi rena kompletamenti riba di tudu.

<sup>29</sup>Kilis ku ta batisadu na konta di utrus ku muri, kal ki se speransa? Si kontra na bardadi mortus ka ta lanta, ke ku manda jinti na batisa na se konta? <sup>30</sup>Anos tambí, ke ku manda no ta nfrenta pirigu tudu ora? <sup>31</sup>Kada dia N na pera muri. Ña ermons, N konta bos asin pabia di kontentamentu ku N ten na bos, na no union na Kristu Jesus no Siñor. <sup>32</sup>Si i son pa kualker purbitu de mundu ku N luta na Éfesu ku limarias brabu, ke ku N ngaña? Si mortus ka ta lantandadu,

“I minjor no kume, no bibi, pabia amaña no na muri.”

<sup>33</sup>Ka bo ngana bo kabesa. Mau kumpañerasku ta dana bon manera di yanda di algin. <sup>34</sup>Bo riba pa bon kamiñu; ka bo yanda mas na pekadu. N na fala pa bo borgoña kuma utrus inda ka sibi nada di Deus.

### **Kurpu ku no na lanta ku el**

<sup>35</sup>Algin na punta: “Kuma ku mortus ta lanta? Kal koldadi kurpu ke na tene?” <sup>36</sup>Tulu! Kil ku bo sumia, i ka na nasi si i ka muri purmeru. <sup>37</sup>Kil ku bo sumia i ka ki planta ku na bin nasi, ma i simentera son, di trigu o di utru koldadi. <sup>38</sup>Deus ta bisiti kada simentera konformi i misti; kada simentera ku si kurpu propi.

<sup>39</sup>I ka tudu karni kiuntu. I ten karni di omi, karni di limaria, karni di kacu, ku karni di pis.

<sup>40</sup>I ten kurpu di seu, ku kurpu di tera. Bonitasku di kurpu di seu i un kusa; bonitasku di kurpu di tera

i kauntu. <sup>41</sup>Sol i ten si bonitasku; lua ten di sil, strelas tambí e ten, ma strelas propi, i ten utrus ku mas ta lampra di ki utru.

<sup>42</sup>Asin ki na sedu ora ku mortus lanta. Un kurpu ku nteradu i ta podri, ma ora ki lantandadu i ka ta podri. <sup>43</sup>Si i nteradu i fiu, i fraku, ma ora ki lantandadu i ta bonitu, i forti. <sup>44</sup>Si i nteradu i kurpu di karni; ora ki lantandadu i ta sedu kurpu di spiritu. Si kurpu di karni ten, kurpu spiritual ten tambí.

<sup>45</sup>I sta skritu na palabra di Deus kuma purmeru omi, ku sedu Adon, i dadu vida. Sugundu Adon i Spiritu ku ta da vida. <sup>46</sup>Bo ntindi kuma i ka spiritual ku ta bin purmeru, ma i kurpu di karni; dipus, kurpu spiritual. <sup>47</sup>Purmeru omi, kumpudu di reia, i di tera; sugundu omi bin di seu. <sup>48</sup>Kilis ki di tera e sta suma kil ku kumpudu di reia. Kilis ki di seu e sedu suma kil ku bin di seu. <sup>49</sup>Suma ku no parsensa i di kil ku kumpudu di reia, asin tambí no na tene parsensa di kil ku bin di seu.

<sup>50</sup>Kusa ku N na fala bos, ermons, kuma karni ku sangi ka pudi ten parti na renu di Deus; nin kusa ku ta dana ka pudi ten parti na kusa ku ka ta dana.

<sup>51-52</sup>Bo sukuta pa N konta bos un bardadi ku sukundiduba: I ka tudu nos ku na muri, ma, ora ku ultimu

**15.30:** 2 Kor 11.26 **15.31:** Rom 8.36; 2 Kor 1.8

**15.31:** 1 Tes 2.19-20 **15.32:** Ekl 2.24; Is 22.13

**15.36:** Jon 12.24 **15.43:** Dan 12.3; Mat 13.43; Fil 3.21

**15.45:** Kum 2.7; Rom 5.14 **15.45:** Jon 5.21; 14.6; Kol 3.4

**15.47:** Kum 2.7; 3.19; Jon 3.13,31 **15.48:** Jon 3.3,6

**15.49:** Kum 5.3; Rom 8.29; Fil 3.20-21; 1 Jon 3.2

**15.51-52:** Mat 24.31; Jon 5.25; Fil 3.21; 1 Tes 4.14-17

korneta toka, no na transformadu di repenti, suma yabri ku fica uju. Ora ku korneta toka, mortus na lantandadu; nunca mas e ka na muri. Anos no na transformadu, <sup>53</sup>pabia i pirsis kil ku ta dana pa i bida kil ku ka ta dana; kil ku ta muri pa i bida kil ku ka ta muri. <sup>54</sup>Ora ku es sedu, kil ku ta dana bida kil ku ka ta dana, kil ku ta muri bida kil ku ka ta muri, asin kusa ku sta skritu na bin sedu: “Mortu ngulidu, vitoria ngañadu!”

<sup>55</sup> “Mortu, nunde ku bu vitoria sta? Mortu, nunde ku bu fidida sta?” <sup>56</sup>Fidida di mortu i pekadu. Forsa di pekadu i lei, <sup>57</sup>ma Deus obrigadu manera ki ta danu vitoria na no Siñor Jesus Kristu.

<sup>58</sup>Asin, ña kiridu ermons, bo sedu firmi; ka bo bulbuli; bo tene sempri vontadi na tarbaju di Siñor, suma ku bo sibi kuma, kusa ku bo fasi pa Siñor i ka amonton.

### Oferta pa krentis di Judeia

(Rom 15.25-29; 2 Kor 8—9; Gal 2.10)

**16** <sup>1</sup>Aserka di kusa di oferta pa juda krentis na Jerusalem, bo dibi di fasi suma ku N da ordi pa igrežas na Galásia. <sup>2</sup>Kada dia dumingu kada un di bos ta pui aparti si oferta, konformi i ngaña

ki semana. Diñeru ta rakadadu pa, ora ku N bai, i ka ta pirsis lantanda oferta. <sup>3</sup>Ora ku N ciga, N na da kartas pa jinti ku bo kuji, N manda elis pa e leba bo oferta pa Jerusalem. <sup>4</sup>Si no oja kuma i bali pena pa N bai, e ta bai ku mi.

### Planu di Paulu

<sup>5</sup>N na bai visita bos dipus di N pasa na Masedonia, pabia N ten ku pasa la. <sup>6</sup>Talves N ta fika ku bos tok cuba kaba. Dipus, bo ta judan na kamiñu pa kau ku N na bai. <sup>7</sup>N ka misti fasi bos visita kurtu, ma N misti tarda ku bos, si Siñor seta. <sup>8</sup>N na fika na Éfesu te Pentekostis, <sup>9</sup>pabia porta yabri pa no fasi tarbaju di garandi purbitu, ma i ten manga di inimigu.

<sup>10</sup>Si Timótiu ciga la, bo fasil pa i sinti a vontadi na bo metadi, pabia i sta na tarbaju di Siñor suma mi. <sup>11</sup>Ka ningin njutil. Bo judal pa i kontinua si bias ku pas, pa i pudi bin nunde mi, pabia N na peral ku ki utru ermons tambí.

<sup>12</sup>Aserka di no ermon Apolu, N pidil ciu pa i bai ku ki ermons pa visita bos, ma i ka sinti kuma i dibi di bai inda. I na bin bai mas tardi, si i oja manera.

### Manteñas di kabantada

<sup>13</sup>Bo toma sintidu, bo fika firmi na fe. Bo sedu forti suma omi balenti. <sup>14</sup>Tudu ku bo na fasi, pa i sedu ku amor.

<sup>15</sup>Ermons, bo kungsi familia di Stéfanos, kuma elis i purmeru konvertidus na Akaia. E ntrega se vida

**15.53:** 2 Kor 5.4 **15.54:** Is 25.8; Apok 20.14  
**15.55:** Os 13.14 **15.56:** Rom 4.15 **15.58:** 2 Kron 15.7  
**16.1:** At 11.29 **16.5:** At 19.21; 2 Kor 1.16 **16.6:** At 15.3  
**16.9:** At 14.27 **16.9:** At 19.9,23-41 **16.10:** At 16.1;  
 19.22 **16.11:** 1 Tim 4.12 **16.12:** At 18.24  
**16.13:** Mat 24.42; Ef 6.10; Kol 1.11 **16.14:** Ef 4.15;  
 1 Ped 4.8 **16.15:** Kap 1.16

pa sirbi pobu di Deus. N roga bos  
 16pa bo sužeta koldadi ki jinti, ku  
 tudu kilis ku na pui mon na tarbaju  
 pa juda.

17N kontenti suma Stéfanus ku  
 Fortunatu ku Akaiku bin, pabia e  
 toma bo lugar ku na faltanba. 18E  
 animan, suma ke anima bos. Jinti  
 suma es, i bon pa rikuñisi elis.

19Igrežas di Asia manda bos  
 manteña. Ákila ku Priska ku igreža  
 ku ta junta na se kasa manda bos

manteña di amor na Siñor. 20Tudu  
 ermons manda bos manteña. Bo  
 fala ŋutru manteña ku bežu santu.

21Ku ña mon propi N skirbi es:  
 Manteña di Paulu.

22Si algin ka ama Siñor, pa i sedu  
 maldisuadu.

Maranata! Siñor, bin!

23Fabur di Siñor Jesus ta sta ku  
 bos.

24N manda ña amor pa bos tudu,  
 na Kristu Jesus.

---

16.16: Eb 13.17 16.18: Fil 2.29; 1 Tes 5.12-13

16.19: At 18.2; Rom 16.3-5 16.20: Rom 16.16

16.21: Kol 4.18; 2 Tes 3.17 16.22: Gal 1.8-9

16.23: Rom 16.20